

## 一、予我上數念的彼个人

許沛琳

昨昏暝我又閣夢著你矣……

佇咧夢中的你，猶原是真莊嚴，恰你在生的時陣全款，一點仔都無變……

自從你過身了後，這是我第二擺夢著你……

我 永遠都會記得頭一擺夢著你，是你過身無倂久，去嘉義共你送上山頭了後，我的心情就親像是拄著大風的海湧，無法度平靜。彼暝，我真數念你，倒佇眠床頂，反來 反去，暎袂落眠。頭殼內，干焦想講你到天頂了後，敢會共我放袂記？後擺我若是想你、我若有話想欲共你講， 按呢我欲按怎？我一个人親佇棉襪被內底，那看你的相片人那吼，吼甲暎去。講起來，嘛是真聖，彼暝，我就夢著你矣。

佇 咧夢中，是下課時間，你坐佇教室頭前，同學攏咧做家己的代誌，予你罵慣勢的我，目睷根本都毋敢相對你彼片去。啥人知影，你雄雄共我叫去，講：「是按怎交男 朋友無共老師講？」我聽了煞驚一越，就暎袂去。精神過來，才知影原來這是一場夢，嘛因為看著你真安心，所以我真緊就閣暎去矣。

最近，我為著學業的代誌咧操煩，毋知影到底欲去考研究所抑是欲去實習做老師？我就想著佇我高中的時陣， 你三不五時攏會講，畢業了後的學姊定定攏嘛會轉來揣你講心事，無論是學業抑是愛情。彼時陣，阮攏毋相信，心內想講：「老師遮爾歹，到底有[啥人]會閣轉來 揣你討論？ 家己褒較袂臭臊啦。」啊毋過，到這馬我才知影，老師你講的攏是事實。高中三年，逐工攏恰你生活

做伙，讀冊做伙、食飯做伙食、耍嘛耍鬥陣，我敢講：「你是全 學校上認真、負責的導師，嘛是全校上關心學生的老師！」

咱 學校，是一間私立中學，升學的壓力已經真大矣， 而且你佻恁翁閣攏是恁資優班的，閣再加上你的身體本來就無好，欲恁阮三冬，真正是一个真食力的工課。佇咧阮高三的時陣，有幾若擺，你攏因為身體袂堪 得，煞來請假。有當時仔，課上到一半，你就會雄雄頭楞，無法度講課， 叫阮家已看冊。自阮一年仔到三年仔，你講課自來就毋捌用『mài-khuh』；毋過彼站仔，你攏愛靠伊才有法度上課， 阮逐家攏真煩惱。

## 二、五月天的旅行，五月的雪

賴淳茹

透早，一陣朋友來阮兜樓趺腳電鈴。我當好睏，聽著有人咧腳電鈴實在是真煩，較苦仔 起來，毋情毋願去開門。門才開一半，恐怖的叫聲就貫過門枋，迴到我的耳空。「啥？你猶未換衫喔！你敢袂記得今仔日欲去看五月雪矣？」一向嚨喉空上大的阿庭目睷激甲大大蕊咧喝。

「五月雪？」我雄雄想起昨暗，欲睏進前接著的「通知」。這聲，我真正完全醒矣。「歹勢啦！予我十分鐘，我隨落來！」

幾分鐘後，阮就已經佇咧前往山頂的路裡囉！

沿路，阮那騎車那唱歌，這是阮這陣朋友的特殊習慣。雖然騎車的佻坐車的攏腰痠背疼，毋過時間佇阮〈快樂的出帆〉、〈滿山春色〉、〈四季紅〉的歌聲中真緊就過去矣。

「看著矣！看著矣！我看著五月雪囉！」車拄幹入去山路，就看著山頂有一大片開甲白白白的五月雪。因為是頭一擺看著，害我歡喜甲共形象攏擘無去矣。

阮 車騎咧一直對山頂蹓去，綴山路幹來幹去，總算蹓到勝興車站矣。躉過一條充滿客家風情的街仔路到勝興車站，聽講勝興車站是縱貫鐵路上懸的車站，既然無法度去 玉山攻頂，攻到上懸的車站，嘛有享受著上懸的感覺！阮趕緊共車停予好，做一睏衝到車站鐵枝路邊。雖然彼工天氣真燒熱，毋過溫柔的

風吹佇阮的身軀，敢若咧掖 五月雪，唱風的歡迎曲，歡迎阮來到遮，阮的心情  
隨就變甲真爽快！

為 著欲做一个好遊客，阮誠負責任佇四界翕相；對蓋有歷史的車站、真  
久無火車走的鐵枝路，到烏嘛嘛的磅空，完全無想欲共這個所在的任何一个特  
別的角度落勾去。除了翕相，閣有一項做遊客一定愛做的代誌就是頓紀念印仔  
啦！我有買一本紀念冊，佇紀念冊頂懸頓一堆大大細細的紀念印仔，感覺真滿  
足，了後才予彼陣趕緊欲去 磅空耍的朋友摸到磅空邊去。

### 三、永遠的陳溝溪

林義和

咱若駛車行鹿港迴南投這條台 76 號東西向快速道路，來到埔鹽段，佇南北兩片大路的中央，有一條成百米的大溝，在地人共伊叫做「陳溝溪」。

若問講陳溝溪佇佗位，相信大部分的人攏毋知；就算講提上新的地圖來反，嘛揣無。陳溝溪對外埠頭的人來講，是一個真生份的名。毋過，若佇彰化縣的東福興俗秀水鄉南片，對這箍圍仔成十個庄頭的人來講，陳溝溪就親像是 的 父母全款。

論 真講起來陳溝溪毋是真長，伊只不過是引八堡圳的水流落來的一條溝。水頭過埔鹽埤就是員林大排，水尾行到鹿港就是福鹿溪，總長無夠一舖路。溝底離駁岸袂超過 三米。早前農業社會在地人無水道水，所有的生活用水，毋管是田欲用的，抑是人欲食的，攏愛靠陳溝溪。連熱天時仔，風颱大水嘛愛靠陳溝溪來消敵，會使講陳溝 溪毋但是附近這幾個庄頭上重要的水源，嘛是袂當欠缺的排水溝。

本 底彰化縣農田水利會佇陳溝溪的中段——陳溝庄，有設一個抽水站，號做「台灣溝抽水站」。這個抽水站佇 1949 年 12 月 22 開工，隔轉年 5 月 30 完成。自本 有四台五十馬柴油『iǎn-jín』的抽水機，1987 年 3 月才閣全部換新。佇抽水站猶未運轉進前，遮附近的田恰人攏是靠天咧過日，無雨水的時陣，田底 必痕，無法度種作。鼓井斷滴，無水通食，著愛等到雨水期，田才有水通用，鼓井嘛才有水通食。彼當時的生活，絕對毋是這馬的少年人有法度體會的。一

直到抽水 站起好了後，在地人才毋免過彼種看天生活的日子。干焦予這個抽水站致蔭的這成十个庄頭，面積就超過七百甲。這箍圍仔的農產品，包括米、番薯恰荷蘭豆攏是全 國上主要的生產地。

佇 台灣溝抽水站，除了有四台主要的抽水機以外，猶閣有一棟機房恰一棟宿舍。外口有一窟水池仔，四箍輾轉有種真濟樹仔恰花，光景實在真嬌。溪水清清清，魚、 蝦、蜆仔有夠濟閣看現現。雙月的草仔、樹仔青翠青翠。抽水站前有一个閘水壩，平常時仔壩底水沖絞，上深的所在才兩、三尺爾爾，是因仔上愛落去耍的好所在。